

## Waraga ya Bölis ma tunggu co Filimon Tafa'da tamma

Bölis ya tafiini ya aganna ka pabuusu ya, yiini ka tarigiri waraga ya. Filimon aga ömö'di ma kaniisa ya ana almaala dhabbu ya, a tasaga tiya iini Önisimös ka arünö ya. I'i amma ka Yasu akinyi linggo a Bölis. A Bölis tuurugu Önisimös co Filimon a waraga tiya, iki iini a'da afa kini. Ka seriyë ma Rööma iki a'da, ömö'di tiidi tasaga yiini kini ka tarünö. A Bölis tiki a Filimon a'da amma ka tasaga tiya iini kada ömö'di ma kaniisa kada örre tiya iini.

### *Töøjülü*

<sup>1</sup> Waraga ya ö'dö ndama a'a na Bölis no, ömö'di yungngo ka pabuusu ka üüdü ma ya Yasu Almasihi ya nja örre ma angnga Timosaws, unngngo takunggu co o'o Filimon ömö'di ma linggo yiidü nja tata'diila ma unngngo.

<sup>2</sup> Nunggu co inye tammo aja Abafiya nunggu co nja Arkibus teefe ma angnga ya alinggo nja angnga nunggu co kaniisa tammo küdü ka 'di mo.

<sup>3</sup> Aaga aneene a türü tanno Masala Pupa yaaja a ta'diila miini nja Uugaara Yasu Almasihi.

### *Tasaasa na Filimon nja tamma ka Masala*

<sup>4</sup> Filimon, üürü eede ka tafara ka Masala nagüügi a'a eere yüüdü namana ta'diila a Masala

<sup>5</sup> kudumma a'a ka taföönyö a'da o'o namma ka Uugaara Yasu nja tasaasa kadu ma kaniisa nye'd'de kungngo.

<sup>6</sup> Afa müüdü ka toso ka tamma ka Masala nja kadu töccö, ara a'a tafara ka Masala amang kene tö'dö tussu baraka nye'd'de ya Almasihi ka anangnga angnga ya.

<sup>7</sup> Ka'diila oona eede ka tasaasa tanno üüdü no küdü ka anangnga kadu ma kaniisa ka tadhodho ka nanggeedi.

### *Teema tumma ma Önisimös*

<sup>8</sup> Nggeege ara a'a takuru rüsü ana Almasihi kada örre tiya üüdü niki o'o a'da nüünī nīimö yüüdü ka tüünī ada a'a ya.

<sup>9</sup> A kudumma eede ka asaasa o'o, yungngo eede ka tirina o'o, a'a na Bölis no kada dharu kungngo, nanna ka pabuusu kudumma Yasu Almasihi.

<sup>10</sup> A'a nasaasa o'o a'da namma ka Önisimös ka üüdü miini, kudumma iini ka taganna ka pabuusu nja a'a afa 'bii'bala yeede.

<sup>11</sup> Ka dhidha taalo a'diila nja o'o, a 'bitingngö anda 'diila nja o'o nja a'a afe'de.

<sup>12</sup> Ara a'a tapadaga i'i co o'o yeede ka asaasa i'i ana eedi.

<sup>13</sup> Nasaasa a'a tafa kini akarna ka 'buugu tiya üüdü ütü kita nja a'a akinyi linggo a'a eede ka tanna ka pabuusu, kudumma tumma ma Masala.

<sup>14</sup> Taalo a'a nasaasa ta'bunu o'o kide, nasaasa a'a o'o nalinggo ndama eedi tiya üüdü, a'a taalo nara tüünī nīimö a'da nitaalo o'o namma kide.

15 Afeene afa ma Önisimös ka tunggeene üdü ka 'di agünü idhilli amang kini tapadaga küdü ka 'di turi.

16 A ndama uuru tanno taalo ara ta tasaga afe'de, lakiini agii'bi ta tasaga, anda teefe ma a'a dhorro, a küdü agii'bi ta tasaga anda örre küdü tanögöre ma Uugaara.

17 Üürü nümmü o'o a'a kada örre tiya üüdü ka Masala kidha ya, amma kini afa müüdü ka tamma kede kungngo.

18 Üürü i'i agüünī tatoroko ana o'o, üürü nasaasa o'o kömüsü kini ka oona ya, asaasa kede ara a'a ka anangnga o'o.

19 A'a na Bölis, narigiri a'a tumma no a nüüsö ma a'a, ara a'a tanangnga eema ya o'o. Taalo a'a nara tütü ka kömüsü tammo eede küdü ka oona, kudumma eede ka tanangnga o'o kada ömö'di ma Almasihi.

20 Örre eede, üünī ta'diila ana a'a ka Uugaara kidha, 'baga eedi yeede ka Almasihi kidha.

21 Nussu a'a a'da ara o'o talinggo tumma neede ka tirina o'o no, nütü ka tussu a'da ara o'o talinggo eege ka tagii'bi neede ka tirina o'o no.

22 Indinaana 'buugu ma füngngö eede ku'bu, kudumma eede ka tindhigi a'da Masala mara tamma ka tafara tanno ada kono mo, mapadaga a'a kada kannaa.

### *Töøjülü na eere no*

23 Abafaraas yungngo ka pabuusu nja a'a kudumma Yasu Almasihi ya öøjülü aaga.

24 Nja Murkus nja Arestarkos nja Dimas nja Lüüka no alinggo nja a'a no.

<sup>25</sup> Fa ka türü tanno Uugaara Yasu Almasihi ka neene nja aaga in'dili kungngo.

## **Katcha**

### **Katcha-Kadugli-Miri: Katcha (Old Testament)**

copyright © 2020 Wycliffe Bible Translators, Inc.

Language: (Katcha-Kadugli-Miri)

Contributor: ECS Diocese of Khartoum Translation Department

All rights reserved.

2020-11-18

---

PDF generated using Haiola and XeLaTeX on 18 Apr 2025 from source files dated 29 Jan 2022

bc98a4a0-1c85-5c7a-932a-7dcefd213f80